

**Siunnersuut uunga: Naartunermi, erninermi meeravissiarternermilu
sulinnigiffeqartarneq pillugu Inatsisartut inatsisaat**
(Isumaginninnermut Naalakkersuisoq)

Akissuteqaat.

(Isumaginninnermut Naalakkersuisoq)

Aappassaaneerneqarnera.

Ilaqutariinnermut ataatsimiititaliamut qujanaq, inatsisissatut siunnersuutip tigulluarneqarnera pillugu. Qujanarpoq siunnersuut siammasissumik tapersorsorneqarmat

Pingaaruteqarpoq kommunit ilisimasassatigut naammattumik tunuliaqutaqarnissaat inatsisip atortinneqarneranut atatillugu, taamaattumillu kommunini sulianik ingerlatsisunut inatsit akuersissutigineqareerpat piffissami naapertuuttumi pikkorissaasoqarumaarpoq. Tamatumunnga tunngatillugu aningaasanut inatsisissatut siunnersuummi 2010-moortumi konto pingaarnermi 30.01.03-mi, - Isumaginninneq pillugu pikkorissartitseqqinnerit ilinniartitseqqinnerillu, - aningaasaliissutissanik immikkoortitsisoqareerpoq, taamaasillunilu Isumaginninnermut Naalakkersuisoqarfimmi inatsisissap atortussanngortinneqarnissaanut atatillugu pikkorissaanernik ingerlatsissaq.

Naalakkersuisut aamma allannguutissatut siunnersuuteqarput Inatsisilerinnermut allaffeqarfiup uparuaaffigisaanut tunngasuni, kiisalu § 14, imm. 1-imut tunngatillugu, tassani siunnersuutigineqartoq sulinnigiffeqarsinnaanermut piffissaliussaq annerpaamik sap. ak. tallimanik sivilisussuseqarsinnaasoq peerneqassasoq, pissusissamisuumngimmat piffissamut sullinnigiffeqarfissamut atatillugu taamatut piffissaliilluni killiliinissaq. Ilanngullugu siunnersuutigineqassaaq inatsisissatut siunnersuut 1. marts 2010 atortussanngortinneqassasoq, taamaalilluni atortussanngortinneqannginerani pikkorissaasoqarsinnaaniassamat.

Ilaqutariinnermut ataatsimiititaliap isumaliutissiisummini oqaatigaa ataatassaasoq meeqqamik najungaateqartoq, meeqqamullu ataaviunngitsaq qitornassani peqatigalugu sulinnigiffeqarsinnaasariaqartoq. Naalakkersuisut isuma taama ittoq paasilluarsinnaavaat. Ilutigitilluguli aamma pingaaruteqarpoq tikkuassallugu angajoqqaatut inissisimanermi pisussaaffeqarlunilu pisinnaatitaaffeqartoq. Ataativusoq taamaasilluni aamma pisussaaffeqarlunilu pisinnaatitaaffeqarpoq, meeraq anaanaasorlu najugaqatiginngikkaluarlugit. Taannami assersuutigalugu pilersuisuunissamut aamma pisussaaffeqarpoq.

Apeqqut isummerfigisariaqartoq alla, tassalu ataatassap pisariaqarpallu meeraaqqamut qanittumik inissisimasut allat, assersuutigalugu aataakku/aanaakku sulinnigiffeqarsinnaatitaasinnaanerat Ilaqutariinnermut ataatsimiititaliami oqaluuserineqarsimavoq.

Isumaqatigiissutigineqarpoq inatsisissatut siunnersuut taamatut isikkoqarluni naammassiniarneqassasoq, taamaalilluni tamatumunnga ilutigitillugu Naalakkersuisut inatsisitigut pissutsit, aningaasanut tunngasut, inooqatigiittut amerlassusiat, allaffissornikkut kommunini kingunerisassaasa misissuiffigineqarnissaat, kiisalu suliffeqarnermi illuatungeriit

sulinngiffeqarsinnaatitaanermut qanoq isummerniarnersut misissorneqassapput. Naalakkersuisut naatsorsuutigaat tamatumunnga atatillugu nassuiaammik 2010-mi saqqummiussaqaarsinnaanissaq.

Nassuiaammi tassani aammattaaq ilaatinneqassapput piniartut nuliaasa aamma eqqumiitsuliortut inissisimanagerat inatsimmut tunngatillugu ersarissaavigineqarsinnaanersoq, taakkua namminersorlutik inuussutissarsiortutut isigineqartariaqarmata.

Taamatut oqaaseqaateqarluta Naalakkersuisuniit inassutigissavarput allannguutissatut siunnersuutip akuersissutigineqarnissaa aammalu inatsisissatut siunnersuutip oqallisigineqaqqinnissaa qilanaarigatsigu oqaatigissallugu.

UKA 2009/126-2009-256366